

石蓮閣詩

石蓮幼多病十齡前恒經冬不出戶不知所謂學不知所
謂詩也後隨先人任而粵而豫而燕而黔而秦七年歲月
半銷磨於船舂馬足之間不知所謂學不知所謂詩也咸
豐甲寅歸里未一載迭抱風木之傷讀禮家居更不知所
謂詩也已未服闋年二十二見同人爲詩私好之始提筆
效之迨一行作吏見有以性耽詞翰被劾者且以戒詩爲
宗旨故卒以無所成就昔彭瞻庭先生言士子束髮受經
以逮通籍帖括在前簿書在後雖雅意汲古之儒罕能卒
業況詩學廣大尤非敢輕言第人各有心心各有聲古來
忠臣孝子勞人思婦各聲其心之聲固不豫存一體格與

宗派心也惟念古今之存詩者如恒河沙數大率隨世變而淘汰無存唐李琪有詩八百篇傳誦於時盧殷能詩可傳錄者在紙凡千餘篇裴迪與王維賦輞川詩載於維集此外更無存者唐藝文志別集數百家無其書其姓名亦不見於他人文集中元宗簡著格詩一百八十五律詩五百九今世知其名者寡矣詩之不能幸存固易知也願鳥鳴於春蟲鳴於秋有不知其然而莫能自己者宋釋德洪謂譬如候蟲鳴鳥自鳴自己誰復收錄王滹南則譬樂天如柳陰春鶯東野如草根秋蟲明侯一元謂如春蟲秋蚓宣寫和氣自得而止俞賓谷謂蟲之薨薨鳥之嚶嚶機動

賴鳴豈得已而巳袁中道又謂存其緒言以當雁之一
唳吾郡杜文端亦謂翳葉之蟬伏竇之蚓值夫清風朝颯
明月宵臨則不禁自鳴凡皆出於自然不事勉強者也又
云君子讀書論世尙友古人卽學爲詩文亦自適性天無
限樂事終不成爲仕宦功名一齊耽擱舍其所自有而用
心於不可知亦爲不善擇矣予生薄祜早年失學帖括在
前簿書在後二語遂束縛一生今景迫崦嵫來日無多卒
使讀書論世尙友古人者無一成就徒歎爾破蛾飛丸成
蟬蛻能無歉焉邵青門云余索引和凝事宋以前詩文無
自鏤板者老境侵尋所存止此聽其零落未免傷神雖敝

石蓮閣詩自序

帝吾有之吾自享之聊用自娛亦情所難已也乃自錄其
詩略存梗概范東生泐所謂盡刊甘醲肥厚獻酬傭僱之
作者媿無能爲役焉則又自慙無地者矣宣統二年庚戌
石蓮自敘

石蓮閣詩總目

卷一

己未以後詩

未仕時作

卷二

丁卯以後詩上

官京秩時作

卷三

丁卯以後詩下

卷四

庚辰以後詩上

簡外任時作

卷五

庚辰以後詩下

卷六

癸卯以後詩

京外迭任時作

卷七

庚戌以後詩

罷官後旅京時作
闕出

卷八

辛亥以後詩上

旅津時作

卷九

辛亥以後詩中

卷十 辛亥以後詩下

石蓮閣詩卷一

已未以後詩

海豐吳重熹仲懌

雜感四首

上山採靡蕪棘刺傷人衣涉江採芙蓉菱刺傷人肌傷人
非物心擇地自非宜出門望大道大道無偏陂朱旃馳馬
驥薄羣疲牛驅遲速縱異候不致藏北馳菱棘夫何怨自
蹈險與巖幽蘭復幽蘭何時逢採拔

捧土塞孟津銜石填東海其愚不自量其誠乃不悔聖賢
重省過鼓勇若將挽莫謂溜已湮要使白可采圭玷任磨
隴陵谷有更改回頭放屠刀從此謝烹宰

西鄰有貞婦刀尺聲琅琅三更尙未息五更起傍徨朝成
繡袂褰暮成薄羅裳乃以刺繡功猶親燈燭光而我七尺
軀歲月空堂堂白日淹以沒青雲渺難望斯邁與斯征羞
誦鳴鳩章瞻彼眷令原涕淚霑成行

學如逆坂丸少縱則已逝又如上水舟非進則已退攻苦
如攻堅所貴鼓以氣路又歧逕庭流乃分涇渭抉擇一不
精馳且與道背眩奇及務博本末殊曖昧譬若遊名山視
垤而惡岱豈知日用理天地爲充塞不知盡其常何異瞶
犬吠

送張錫雋谷隨侍長安

草草理征鞍高歌行路難此行千里別秋色滿長安關壓
河聲壯雲開華影寒賞音從此去古調爲誰彈

莫灑臨歧淚吟鞭指向西離愁消酩酊別夢繞輪蹄風葉
離亭晚雲山落照低行人留不得把袂意悽悽

執手言難盡諄諄屬莫違辛勤借弱弟珍重護重闌野店
雞聲冷長空雁影稀歸來應有夢漫掩驛亭扉

昔時文酒會惟恐動離愁方謂常相聚何期遽遠遊共看
千里月滿載一囊秋山水添詩興新吟早付郵

秋菊爭持蟹春燈聽賣煙再逢佳會日應動故鄉情黃葉
殘唐塔桃花古漢城舊遊重過此鴻爪尙縱橫

灞水當年岸東風唱大刀綠楊千萬樹吹絮上征袍節序
三秋換流光六載滔前途重過此攀折漫爲勞

與庾生姪城樓望雪

北風凜冽霜林枯昨宵朔雪封蘊廬峭寒透被不成睡攀
帷起看光穿樞端宜打槳掉小艇衝寒訪友山陰途又宜
負囊著簑笠灞橋閒踣尋詩驢門前剝啄有人至奚奴告
我纔行沽引杯澆起出遊興邀我同上城南隅冰堅路窄
屐齒滑欹斜還借筇枝扶乘堙縱目果奇絕笑餘拍掌齊
高呼天地無聲浩一色宛合宇宙成冰壺四圍雲樹忽出
沒茫茫難辨村與墟炊煙幾縷亘遠舍酒旗半捲臨荒蘆

生花起粟顧何暇苦吟對聳山肩癰憶昔辛亥過鳳嶺
巖正值瓊瑤鋪層巒疊嶂失青翠萬峰無際銀模糊曾於
絕頂作小憩盡收妙景歸籃輿自來鄉里已九載此眼久
與青山疏每於枕上聞竹折寂寞往往圓紅鑪今晨幸遇
興非淺願持禁體追髯蘇但祝十日不開齋重來觴詠無
時虛命僮縛帶且掃徑珍藏留待烹茶需

西橋訪雨賦九言體

炎威爍爍避暑無林泉解衣卧榻欲眠不得眠海濱匝月
祈禱苦無雨安得急溜噴薄檐端懸遙憶西橋千樹萬樹
柳春時曾見點點飛輕縣天瓢儻許借我一傾瀉潤青怪

翠入望凝秋煙相與載酒憇息林樾下清風習習定許生
淪漣勾勾忽聞雷聲走天末羲輪無力漸看濃陰連精神
頓爽急呼疲蹇至披蓑荷笠一路揮吟鞭襟袖淋漓溼透
不暇顧但見青條出沐紅欄邊長虹卧波溟濛飛野鷺濃
陰貼樹搖曳嘶鳴蟬水面惺忪亂跳圓暈破枝頭點滴時
有涼風穿塵疴一經洗滌盡忘却不覺四圍暮色來蒼然
須臾阿香停車風伯止但餘雲霞萬色呈新妍金泥銀爛
奇詭不可狀花者玳瑁紅者臙脂鮮魚鱗千疊變幻忽破
碎蔚藍一角劃出斜陽天歸路不愁泥深恐沒肝放將半
鉤新月明娟娟

爲管墨寶題張芷衫畫梨花

兩三點雨未全打廿四番風莫嬾吹
蜨影蜂聲不得到半丸黃月欲平時

多少芳蕤杏後開夢回花底一徘徊
前宵醉倒青旗路飽看春雲滿眼來

車中

難避曦輪煜煜光長途盼斷柳陰涼
天公知憫行人苦盡借山雲作蓋張

題張菊如臨馬雲上劍關秋色

閣道侵雲勢與平蠻叢人作馭風行
耳邊恍聽鈴聲咽十

二年前舊旅情

樓雲隴樹接西秦
驢背斜陽憶此身
今日披圖重回首
當年曾是畫中人

暮宿彭家道口

暮色合蒼煙
西風落照天
溪流寒可漱
沙路輒宜眠
日黑雲將暝
林黃葉不全
况經兵燹後
村落倍淒然

茅柚村邀遊龍洞

欲踐名區約未遑
良朋邀我白雲鄉
道從水複山重入
寺在峰迴路轉藏
日影鞭絲人並轡
石龕燈火夜聯牀
應知此後相思夢
常繞龍巖舊草堂

侵曉人閒上早墩，捫蘿附葛快攀援。
一林黃葉明樵路，四壁丹崖擁寺門。
飛瀑遠尋泉有脈，寒潭倒插石無根。
洞中應有潛鱗蟄，霖雨猶留點滴痕。

次日
細雨

秋夜聽雨感懷

當時于役遠從征，歷盡山程與水程。
野店燈光添黯澹，空江篷背聽分明。
鈴霖閣道猿千里，齋冷淮南雁一聲。
此夜轉生遊子淚，十年前事倍關情。

讀史空生閱世悲，聽殘點點與絲絲。
氣連鯨海滄波暗，月暝龍沙白草滋。
南內疏桐飄砌早，華清紅葉下山遲。
何人此際聞雞起，辜負風濤雨晦時。

雲低風冷雁南還
陰迥空堂鎮日閒
無處移牀嗟破屋
有人翦燭話巴山
連江帆影宵辭楚
滿路槐花曉度關
幾箇疏朋離散盡
天涯何處聽潺湲

浙瀝窗前木葉森
紅閨燒燭伴孤吟
乍逢長夜聽逾好
如此秋涼病易深
荷蓋喧殘圓沼響
蕉聲敲碎曉窗心
却愁一霽添寥落
蕭槭霜風起暮林

園花秋開勝以二詩

玉簪

綠雲委地慵難綰
一枝橫插玉香纈
天風吹秋秋墜階
冰心抱露啼痕淺
馬嵬昔日埋鈿玉
黃土青苔葬寒綠
無乃

搔頭結聚成輕盈如出華清浴秦娥午倦朱樓夢九雛響
溜釵頭鳳簪花代我管鬢雲濃香滿壓螺鬟重

牽牛

青鸞翠鳳下無迹疎籬一夜秋花碧露葉雲叢絡石闌幽
姿不受朝曦惜天孫昨夜悵銀河汎瀾清淚隨秋波灑向
花間成並蒂離懷其柰雙星何我亦頻年輕賦別花時客
裏傷秋節豈獨天潢限女牛一枝未折腸先結

閒居

閒居本業課桑麻十載家山歲月賒夜冷催來新到雁秋
晴留得晚開花倦拋散帙頻成睡偶汲新泉待試茶漫謂

馬頭塵滾滾勝余薄笨御牛車

飢鳥孤燕篇

予少年藐孤連歲復迭遭兄姊之喪煢煢子立觸
景多傷丙寅春重晤墨賓于棣墨賓亦廢詠蓼莪
者感二人境遇之同作飢鳥孤燕篇

樹靜風不停水東波不西戀戀春日暉哀哀孤露思庭中
有高柯飢鳥巢其枝燕燕爾何孤作此萍水期燕無報乳
日烏無返哺時孤燕對飢鳥涕泗霑漣而我親骨肉黃
泉生隔睽慈竹霜先寒椿蔭驚崩摧孑然藐藐躬十載兄
是依其歲值己未姊去商山陘誰云是永訣碁冷聲淒淒

昊天猶不弔傷此墳與麗舍殮弗躬親夢寐時見之兩世
兩遺孤門戶焉支持每逢萊衣人有淚不敢揮七年前識
君已廢瞻帖詩三年前送君西去尋庭闈風煙動地來伊
涼飛劫灰詎謂得凶耗血淚凝麻衣昔我與君遇君遇同
我悲今吾與君晤我遇惟君知瞻彼松柏陰下有草離離
松柏一旦枯那免霜雪欺南陔采幽蘭枝葉春葳蕤及時
念明發馨膳休悔遲不爲集蓼蟲焉知此衷哀區區鮮民
心相對雙淚垂

自西爽歸書所見

不整柴門逐岸開溪光罨畫小樓臺畦邊水嫩棹聲歇樹

底風圓笠影來涼入蟬心秋澹宕雲成山勢石胚胎有情
最是垂楊柳日日斜陽送我回

秋夜露坐

夜色洗空庭閒增露漸冷電光斜射月雲影亂埋星蛩語
催秋至螢流逼樹青茗杯成獨坐與汝訂忘形

將至郡城口占

馬倦知途近無端又客遊西風吹縞袂秋色滿齊州野氣
遙浮郭林梢遠吐樓葵花高一丈黃出短牆頭

由濟南赴泰安途中作

小別明湖計日程征途景物記淒清朝陽山醉扶頭酒秋

水溪吞恨別聲鳬繹數峰皆北向鵲華雙影送南行此遊
爲快平生眼齊魯餘青已漸生

我來恰好話桑麻菜圃瓜田歲事賒豆葉黃於新釀酒柿
圓紅似晚開花野碑按讀文詞斷店壁尋詩墨溜斜莫怨
客窗岑寂甚前途相餉有煙霞

絕峪繁迴路幾彎停驂四面數螺髻村墟瓜蔓茅龍上市
肆花開竹虎間亂石當流成小約疎林留鱗讓秋山未黃
好是青楓葉耐得霜容待我還

驅車山峽馬蹄勞九折聲聞叱馭高一徑溟濛沙作雨兩
輪起伏石如濤當年蜀棧從頭憶來日天門立脚牢安得

嶮巖成坦蕩不因行路怨刁騷

登嶮山

征車偶爲看山停三百盤途取次經一殿高撐知漢近萬松直上與天青秋波十里縈襟帶夕照羣峰拱畫屏俯視村墟若煙海恍如浮玉立亭亭

山河

一帶山河漱玉泉嶮山東去水潺湲僕夫怪我臨流久不聽灘聲十六年

步遊後石鵞

東坡云僕初入廬山山石奇秀平生所未見殆應接不暇遂發意不欲作詩予

遊泰山亦存不敢作詩之心

黃華棧險接堯臺日觀登餘眼界開雲影忽從頭上過松
濤直撼脚根來無風空籟生秋氣咽雨溪聲想怒雷清絕
蓮花洞中水寒泉一琰薦瓊杯

遊靈巖驢背上得句

爲訪名藍古佛祠雞鳴山下路欽寄他年畫稿憑摹出是
我斜陽策蹇時

路轉峰迴境益奇萬松撲翠上鬚眉又將岱麓看山眼來
訪靈巖北海碑

妙公當日闢名場十里松花不斷香無數濃青圍不住孤
標一塔接天長

暮抵五峰

晚煙漠漠夜冥冥
策蹇來敲闕寺扃
月魄恰當山缺落
泉聲祇在樹中聽
廢陵草蔓鶻鶻語
險磴苔荒草木腥
涉盡崎嶇心尙悸
客窗孤枕夢頻醒

石蓮閣詩卷一終

石蓮閣詩卷二

丁卯以後詩上

海豐吳重憲仲懌

鹽山道中遇風

蒼莽迷村墟撲簌揚沙凜風在空中鳴車在風中簸轆深
蹄轂絀塵漲衣裳流輾轉雙轅中顛躓鮮安卧况受田夫
給陷我曰左左旅舍抵已晡炊煙寒土銚小年涉江湖兩
月舟中坐颶信掀天來心膽爲摧挫對此計安危愁顏爲
之破乃知天壤閒無境不坎坷但信立脚牢何慮風塵大
昨日餞家門綠酒珍餚佐丹鉛畫壁新紅紫瓶花嬌敢耽
手足閒坐視身心情行矣慎前途勞瘁休辭瘳

河隄道中感興

竭來河畔逐輕車隄外晴波一道斜
遠岸數帆穿柳色平疇萬樹繡桃花
登樓春思悲王粲落帽秋風感孟嘉
脚下緇塵鬢邊雪催人草草是年華

春暮過津門

樓頭鸚鵡喚提壺白舫紅闌小畫圖
橋下春波橋上柳行人三月出了沽

午潮痕接子潮痕十里連橋到海門
細雨斜風隄上路柳陰壓擔賣河豚

國初諸老擅名場沽上題襟字尙香
今日風流零落盡更

無人問水西莊

津門新樂府

存二章

水會 最好義也

雅而集獠而升煙燄之內爭先登前者未下後者興竿頭
高揭千紅燈此時填街塞巷惟人聲銅烏軋軋水噴薄宛
似鞭能扶海若祝融回祿失儵燦遇災不顧身遇財不染
指誰謂市上兒大義明如此嗚呼忠義天地理風俗轉移
在驅使當今西北方用兵何不教之旗槍與弓矢定執干
戈爲君死

薪桂 憫荒也

年豐積薪亟乘屋年凶拆屋薪不足村中輿來市中行百
錢不得盈一束大車何班班小車何碌碌一日飽暖一家
寒可憐四壁上無覆三椽茅屋已飛灰一席盤殮猶未熟
此時大吏方欲窮餽藪不聞農夫露處吞聲哭况兼雪花
如掌終宵撲村村何異逢回祿我願疆吏心亦化光明燭
全彼屋上茨滅此鼎中餽口腹雖苦閭閻福嗚呼其如日
日須食肉其如日日須食肉

春寒行楊村道中作

桃花將落楊花起東過海門已百里一夜春潮挾雨飛北
風倒捲槽河水須臾沙驚風益怒黃蘗刮盡恒河數土色

雲容雨不分前程已失河西務十步不見人五步不見轍
昏曉莽不知東西渾莫別寒氣中人如鏃鐵我車北來愁
兀跪壓裝未載敝狐裘詎料春三成栗烈吁嗟乎蜷曲委
縮體不舒僕夫咨嘆愁前途車行偃蹇馬趑趄黃塵撲面
砂粒粗寒暖驟如反覆手天與世態何差殊書生強半常
爲客輪蹄奔走紅塵陌天何不憫行路難約束雨師與風
伯永使行人無困厄

籬內桃花

短籬三尺接茅茨映水朝霞豔一枝想見靚妝人半面春
風無語倚闌時

與宋子舟游龍樹院卽懷陳九蘭庾生姪

不識興誠寺登樓快此行
窗開招絮入梯盡見山橫
宿潤濃黏樹春煙淡覆城
憑高莫留戀恐觸故鄉情

葭莢綠成海茶蘼黃上階
恰逢陰雨潤好與友朋借客倦
支危石僧閒說古槐前
賢留勝跡片石寄詩懷

陶然亭子上昔日哭春風
會俯危欄上遙窺此檻中
星霜人事換歲月客途窮
無限前塵感迢迢望海東

端陽後一日與宋子舟陳葆之同游龍泉寺觀壽山

石十六應眞像用查初白壽山石歌韻卽送葆之隨

任池州

賈休昔畫一十六羅漢生綃水墨神態各不同降及後人
崇廟貌粗者土木精者鎔山銅且增十六爲十八雲龍風
虎意態雄福州壽山產壽石但知取以作印蟠龜龍努目
低眉匠心忽有悟卅六變相幻出神熊熊我聞 純廟八
旬咸祝嘏九夷賓服八蠻通閩疆大吏手自封栴檀之室
丹紗蒙輦致來時不及貢供養遂入名藍中八龕駢陳赤
華室阿羅漢直追禪宗蒸栗侔黃點漆黑截肪凝白丹砂
紅壤色之衣善點綴細入神妙秋毫窮我寄僧寮苦逼仄
枯坐一室如樊籠興慶宮前訪元塑劉鑾手技傳羲農又
聞觀音之像出窯變天巧不必雕穹窿士女頂禮日填咽

想見佩玉鳴琤琮得此三奇可鼎足軒輊何必相剽攻
想太平日無事梯航遠致昆吾工餘事猶得作符璽山骨
斲斷巖爲空自從十年事戈鹵甌閩吳越連軍烽饑窮用
賑進獻罷物產不入蓬萊宮君家殿君荷 新命五馬南
去 恩寵充池州九華夙所豔雲中朶朶青芙蓉階前蘭
玉侍游讌萊衣被體猶黃童况復君才足肆應練達何待
加磨礱恨我一身等匏繫未能荷笠擔簦從安得修羅攝
置九華側神力雖大難爲功祝君常保二親樂無極庶與
壽山壽石壽佛同始終

七夕篇時僑寓宣南晉陽僧寺

西風吹梧桐一葉颯然落傳聞此夜中銀河駕靈鵲美人
懷遠道凝妝出蘭閣瓜果羅玉階空庭下金鑰香爲雙星
蒸酒勸雙星酌傷茲離別深惜彼歡會薄長安多狹邪高
樓映北郭定有同心人共此傷飄泊不爲牛女悲當爲牛
女樂結此不盡緣千古深情託豈無歡聚場積久生落漠
何如留有餘終古不離翦風雨遙相望天涯與海角織女
及黃姑歲歲猶嫌數

五月分部假旋出都日作

僧寮僑寓等飄蓬粥鼓鐘魚與夢通剝啄良朋三徑外起
居彌勒一龕中芹泥壘上新來燕桑落河邊獨去鴻出處

名媛詩歸卷二
王
情原同棄屣祇憐此度太匆匆

燕臺景物最關情宣武坊南雨乍晴綠樹萬家低覆屋青
山一角遠窺城人如落葉飄無跡愁似春潮聽有聲聞說
前途成澤國舊行車處片帆橫

牯牛河行

牯牛堤下波浩浩牯牛堤上無青草三伏不雨一秋霖坐
使洪河成渺瀰堤上行人爲我說今年旱甚禾都槁大府
聞頒赦賦書九重屢下桑林禱七月七日雨翻盆滂沱
如挽銀潢倒從此淫霖浹兩旬蠅生竈底閭成沼况復新
開永定河拏焚其柰薪柴少遂使黿鼉逞詭譎居廬汨沒

田原滂我策疲車日下來軌轍蹶躑愁泥潦不辨昔時阡
與陌惟見當前湖共泖輓輒無權舟楫貴軫轅愁大蜻蛉
小囊橐不飽船夫願河干輪輻誰牽掉履蹈方切心憂危
喧呼又苦舌枯燥行路難行路難居人猶道行人好一霎
風帆彼岸飛前途卽是平平道可憐牯牛河下人如魚何
時得見禾生導

店壁新糊尋舊題不得以一詩寫其惆悵

周禮重堊人壁壞則圯墁必使白受采乃可素爲絢左徒
作天問畫壁肇奇幻漢世重石闕篆隸璆琳煥旅人客長
途羈愁託柔翰久因成惡習塗雅到傭販香煤及莖鋒牆

隙爲之徧致觸主人怒且遭行客謾削去情非苛玉石遂
莫判譬如斬荆榛蘭蕙隨剗鏟乃知天壤間顯晦原無券
但讓碧紗籠佳話千秋擅

重九口占

兩年道上作重陽客歲還鄉此去鄉偶上高臺聞嘹唳征
鴻更比路人忙

滄州古城鐵獅

曾聽奔泉說怒猊康居遺範古城西土花清露苔三尺故
址秋風黍一犁宛洛銅駝悲枳棘渥洼金馬起鉦鼙殿前
遣將原倉促鑄錯常留作攷稽

唐官屯店中多蚤不能成寐披衣起坐以詩自遣

巨魚吞細魚鷺鳥搏羣鳥弱肉而強食已難測蒼昊至強
莫如人乃供羣弱飽飛既蠓蚋嘍動亦蝨蟹擾就中最跳
梁狡黠莫如蚤迅比猿騰枝捷若魚穿藻或集而剝膚或
伏而鹽腦瘦作雞肋惜肥似犧牲好想當其視人亦若甘
齏蕘客來旅舍眠一榻空揮掃譬如庖繼肉大嚼遂忘曉
蜚蠊孳無窮蚤蠶不及掉拔劍蠅當驅作檄蚊將討煎迫
既已深越境身乃保不早避柏人那免集於蓼

出都日宿張灣

北風吹我又東歸秋雁春鴻願易違惟有張灣舊明月不

分寒暖總依依

月圓曲

月不能無圓缺人不能無離別昨日鳳城雲今宵滄海雪
昨日辭都月未圓今宵歸家月下弦月圓人却在離別人
歸月又非嬋娟願矢精衛誠填成此闕陷年年歲歲月圓
時團圓常照金尊豔

唐官屯夜發

北風陡起沙石驚吹斷曠野無人行月馭搖搖不得落玉
盤愁向西南傾毳裘身絮絳首耳邊猶聽雷聲吼妝閣丁
東簷馬敲不知寒抵長途否

枕上聞大風口占

天馬萬隊凌空煙風鬣雲轡何茫然忽如一夜失羈綫
騰奔放來人間雷轟電激輪蹄鐵橫空蹴踏層冰裂鼉戴
恐令三山翻不周疑觸地維折羲阿欹側愁無光一丸大
地齊飛揚儻從寰外望寰內火珠冰鏡同頡頏鼓角聲從
地底作紅燈無力書帷薄布衾密裏似眠蠶短躬卷曲如
屈蠖吁嗟乎我想東南方用兵孤軍沙石相逢迎何人仗
劍從征去聽此增人慷慨情

景龍鐘銘歌

建章宮中天欲曉迎祥觀裏鯨鳴早霜杵敲殘百八聲千

載餘音猶裊裊當時玄武門初扣旋貶五王崇五狗中天
聖善與西明土木一朝成不朽觀自景龍年築成倉皇未
及發韶英桑條韋曲覆前轍相王於此調噲吟辛亥之秋
九月役律協景王鑄無射屋上土與釵釧金紀年猶以納
音繹小年隨宦趨庭訓梅花嶺下洪都郡曾訪開元乾德
鐘南安府有開元二十九年鐘蒲牢繡徧苔花暈萍飄十載
到秦關寶室欵揭貞觀年鄭州寶室寺有貞觀二年鐘龍興通元製最
古唐儀鳳二年歸州龍興觀鐘開元十年江陰軍通元觀鐘銘皆見王象之輿地碑目與此鼎足孰
後先寶宇攸鐫辭駢體圭稜篆籀爲根柢屏翳營鑪欵識
精遠躡湯盤近漢洗綬之今在柏臺陬璽墨揭出鋒鋞道

亭林濫觴述菴繼金石攷記歸雍州

鐘見金石錄金石萃編及雍州金石記

猶是當年睿宗筆法善入居先天日

葉法善以先天二年拜鴻臚卿入止於景

龍

觀方技居然拜列卿得位應資冥助術嗚呼西京鐘簴多

星散瓦全猶賴常扃鍵

鐘在臬署俗傳揭此鐘則於廉倉訪不宜故恒閉置揭本罕購

倉

籀從悲石鼓殘我比昌黎生未晚霜夜挑燈句細賡星稀
月落晨鐘鳴從今又踏春明路怕聽闌黎飯後聲

冬夜

月臨樹影眞於畫雪積階除淨若箋逼似倪迂纔脫稿整
新玉版墨華鮮

寒夜齋居

無人除積雪疊作小重山素月時一照峯峯明玉顏疎鐘
浮遠寺寒犬隔花關情境雙孤絕身忘在宇寰

獨居誰是伴孤枕共寒燈炭燼灰如雪茶殘碗作冰問心
談往事呼影不成臆欲取離騷讀疎慵病未能

布衾寒似鐵秫酒煖於春心淡能容嬾身孤不畏貧竹懷
虛抱負梅寫冷精神寥寂同枯衲閑參未了因

心地能知足蒲團大有餘溷茵情一例椒壤相原虛苟信
波濤涉何嫌毀譽俱本來眞面目看取未生初

將赴都門留別庾生姪

父兄庇蔭卅年中此日分離類轉蓬萍海有人問蹤跡我

言游學爾從戎

靜海北遇還家者車上不能作書口占二十八字寄
意

北來幸遇爾還鄉馬上難將墨數行憑向家人傳語道一
天風雪過雙塘

晉陽寺聞箏

一聲聲似響么絃日麗風高二月天我是紙鷂行看子旣
傷飄泊又牽連

哭查紀庵表叔

握手纔如昨傷心忽到今病貧原憲况婚嫁向平心桂圃

秋風冷桑乾春水深趙州金石稿幸未飽紅蟬

君佐陳息凡刺史纂

趙州金

石記

苦讀終何補奇窮竟莫歸徒殷三載望反受一官羈

君以軍功

擢江蘇知縣丁卯秋聞竟以起復無資未得入場

銅鼓書堂圯橋亭卜硯非可憐

淮浦上孤雁尙分飛

謂恬齋表叔

憶我先君子偕公若弟昆三秦同畫省兩浙共輶軒王粲

陳游跡舉魚舊淚痕何時臨宿草痛哭一招魂

王孝女四十壽詩

孝女爲高郵王文簡公孫女甲辰進士湖北武昌道王公壽同之女

不嫁奉母

庸人但守經賢哲能達權不爲恒情拘所以全其天邦溝

之水清如許尙書門第今鄒魯家世傳經重後賢父作忠
魂子孝女孝女何挺生誕降已丑歲至性有過人不矜凡
智慧方其爲書刺血時淋漓兩紙明堅志願親視女如廢
男此言得勿傷心最一朝江漢成兀跪景春父子垂遺烈
明李房景春亦江都人知鄂北
房縣羅汝才入房父子並死焉朝廷加諡褒忠節六千里
外轉歸來割肉附棺血猶熱吁嗟乎睢陽齒常山舌黃泉
千古不能滅忠臣之骨孝女肉忠孝都是誠心結小年籲
疾天花弄小年爲親病籲天臂肉重刳合劑共進食能教
母病瘳襄創那計兒身痛至今四十年孩提如一日卽此
設悅晨萊衣猶繞膝我思此事則異心則純終身之慕今

有人此固聖賢所願見而不敢以苛常人又聞古今不朽
德爲本大德必壽理惟允添籌益竿總諛詞俛視人間修
短如蛄菌德門人瑞今可枚後先同揆庸何猜天報善人
如是哉請看此日開宴處蕭颯秋霜壽母眉

孝女伯母曾以孝聞族里

今已八秩亦於是日稱觴

贈星謀

十年抑塞此浮沈用斛量愁海樣深我輩逢場原是戲幾
人持論冒平心頭顱未必終如舊遇合安能總似今流水
光陰慙愛惜鬢絲容易上華簪

秋涼初透夜雨淒然客感百端紛來心上倚枕無眠

拉雜得二百餘字名之曰問秋詞

草根絮絮哀蛩語金飈一夜吹庭宇薄寒如水襲羅衾秋
在蓼花枝上雨此時節物傷心易此時蕩子多秋思黯黯
寒燈旅客魂綿綿遠道相思淚憶自槐黃事奔走十年強
半羈棲久歷下河山燕市塵後爲壬戌前辛酉春官三上
貂裘敝可憐豔說貲郎貴像貌全忘不虎頭功名妄自侈
羊胃去年滯跡住京華喧豗夜聽坊南車今年移居近太
液借巢客燕嗟無家秋兮秋兮爾胡不擇地蕭騷偏觸游
人意長安不乏王侯第多少羅幃繡幕中有人遲汝驅炎
熾不然芙蓉池館梧桐院珠履趨陪侍歡宴煩疴一夕全

消散又况城南一帶多高樓豪客爭爲汗漫游調冰雪藕
猶苦熱何不吹涼早上珠簾鉤豈其秋士乃屬秋知己相
尋故引秋心起銷魂從古說江郎工愁無乃歸平子推枕
問秋秋無聲一鐙如豆窗閒明西風吹我下階去蕭條夢
作鄉關行

旅店夢醒枕上作

冷逼孤燈燄不明茅檐霜重夜三更驚殘好夢無蹤跡
馬窗前敲草聲

棄婦詞

精衛有時倦海水無乾期妾非有時悔郎心無轉移非郎

心不移妾罪難爲詞妾本賤家女謬荷加禮儀萬籊附喬
木比翼連理枝日有中與昃月有盈與虧人有聚與散自
使成乖睽常分負罪終敢作秋扇悲

憶昔與君值頗謂可君意生小長千里日日門前戲結髮
爲夫婦膠漆有不啻非特蕪悴顏所恃君不棄三月春風
歇七月秋風至花落不再榮葉落無重植迢迢牽牛星七
襄錦空織努力愛前修勿復長相憶

舊人今日哭新人明日笑舊人初來時亦似新人貌積懽
乃生厭恃愛斯見帽我有青銅鏡留爲新人照匪足迎後
人負恩莫我做區區一寸心請爲新人告善保初與終免

郎前轍蹈胎君薄倖名撫躬以自悼

舊鈔漁洋七古平仄論一冊雋谷甥持去付鈔蓋欲肆力於古也歌以紀之並寄梅岑羅山庾生都中

國朝吾東詩家峙鼎足新城牛耳輝尊疊不著跡相謝雕琢羚羊香象羣驚猜飴山誼尊丈人行談龍一錄眞詼諧後來指摘亦頗有蚍蜉大樹終難摧我讀公詩歎觀止邯鄲學步嗟無媒幸從師門見公論振聾起瞶心爲開恨無力追風雅志能換仙骨抽凡胎張甥如金惜筆墨硯雖未發眞清才譬東雲鱗西雲爪偶然一露何神哉忽見此編竟漫去寶之不異千瓊瑰念我四人舊同學鐙窗露硯相

追陪老梅痴嗜在白陸造詣漸與坡仙儕吾家阿咸好奇
豔樓頭欲把青蓮杯嗟我駑駘誠下走苦無入室升堂階
頽唐心志近益甚更無清興尋敲推今得提倡如見獵心
喜不及刪謠哇受降三城我願築甘輪壁壘眞崔嵬會借
郵筒寄二子汴流淼淼燕雲垂

落花

最難堪是欲辭枝乍脫還黏正此時畫檻久移憐地遠金
鈴要護恨旛遲休將劫數歸風雨終是栽培欠主持不見
青青松與柏柯條不改歲寒姿

綠章一夜下三天難乞春陰倍惘然茵溷而今分上下枝

柯當日最連翩送歸何處憑春水惆悵空枝賸曉煙賸得
文姬終有恨漠闕逝水咽潺湲

勸內子學書

風雨孤燈守敝廬簪花標格乍臨書盈箱金石存家學插
架縹緗富舊儲淡泊聊安儒素業辛勤且補女紅餘塗雅
兒輩無批抹好代游人課墨豬

閨閣從來擅勝流衛夫人筆畫銀鉤休將十指空爭巧學
製雙鱗好付郵客子無亭留問字故家有硯可成秋兔園
冊子誰收拾諒我清貧試一籌

急雨

一氣放奔騰風催雨勢增電轟雲有罅簷逼溜生稜苒翠
波三尺苔青砌幾層清涼如可借從此謝炎蒸

七夕大雨時燕齊河皆決邑幾爲澤國有憂焉詩以

代額

歲次鶉火天炎燭流金爍石萬物焦鯉鰈涸轍鳥焚巢人

如吳牛喘且哮火濁金伏三更交頗羅墮氏攝其曹

畢星
姓頗

羅墮氏元冥屏翳紛相招雷車霆鼓雲旗旂踟躕闔闔翻天

瓢墨螭翠蚪逞輕趨銀潢一決誰舉焚冰夷乘隙恣騰騰

鞭驅五龍駕六鼉命蜎像前揮其旄魚魚逐隊鼉揚枹海

若助虐天吳驕挹彼尾閭注斗杓地柱汨沒天棧漂誰以

漏卮安青霄排山倒海川岳搖
駟鎗鞬何敖嘈匹練倒挂銀繩綯
弩箭筈脫珠盤跳大瀛裊海連波
濤夕雨夕汐朝雨潮連房奧室游
文鯨鰭鯨入門升堂坳龜觚唯聽
蠅喧囂隗將上訴揚厥鏹飛挾霤
瓦掀屋茅崩厓齧岸平壑濠驪淵
鮫室羅垌郊黍稷穰穰服膺膏天
關一扣靈瑣遙帝命鬱儀炎其歆
霞車虹靺相戰鏹崦嵫纔暮陽谷
朝羣陰退避如藏逃驅河伯去歸
其槽泥塗一過斥鹵苗甌窶汚邪
皆斗斛萬事消息離坎爻乃知太
極陰陽包天津之間兩旗交天孫
此夕乘雲輶我願爲鵲填其橋冀
牽牛星降豐饒

中元日携兒輩掃墓

兩載中元在客居何會邱壠薦秋蔬傷心蒿蔚嗟曷恥無
恙松楸幸燹餘一輩雲初新乳燕十年雪涕舊皋魚露濡
霜降空悲感慙愧前賢署柏廬

贈李少筠比部

爪印鴻泥記昔因兩年異地絕音塵關山幾度勞魂夢風
雨今宵見故人春酒疎鐙紅一剪蓬門秋草綠雙輪明明
如月來相照惟有延平性最真

秋齋讀書

涼聲淅瀝影玲瓏不是朝暾是曉風一樹秋陰能賺我教

石渠寶笈卷二
三
安筆硯小窗中

絕無人至砌生苔飯後茶餘一卷開兩扇碧紗攔不住夕陽曝到亂書堆

寓意

匣中雙龍鏡襲以古錦囊無使纖翳塵滑此清瑩光有時開寶匳百里分毫芒形過影不留乃可懸虛堂從知圓靈質不以屢照傷

青銅三尺鋒瞥眼驚如電陸旣犀象剗水亦蛟螭斷髑髏用非材摧折因之見古來千與鑊甘隱豐城縣必與張雷遇氣乃騰匹練

己巳重九徐莊穫稼口占

無萸無菊點秋光
碌碌聲中一晌忙
念到游人方省得
都忘今日是重陽

辛竹舲廣文索畫轉祈芷衫代筆而綴以詩

吾聞蓬萊之閣高
接天十洲三島相
聯縣蟹市紛紛頃
刻出萬象滄海忽
已成桑田乃知觀
物當作如是想莫
以卽空卽色獨讓
釋伽禪吾邑廣文
先生家在蓬萊側
每每豪飲長嘯樓
之顛偶出一卷屬
我作繪事庖人不
治竟使尸祝操刀
前昔者淵明曾抱
枯桐坐知音苟賞
何患琴無絃旁人
責我盜名猶作狡
獪語不知是非眞
假世事皆雲煙

先生一笑亦如觀海市司空見慣何於此畫爲不然

早春登城

卉木將已榮幽草猶未茁質薄怯風疾槩伏愁寒慄境適
游則遐歲月感歎忽破碎畝縱橫融泮冰滑笏煙淡舊時
樹村補新添室樓陰收鏡窺塔影囊錐脫仰逢飛鴻慙俛
對潛鱗艱未足嗟髀肉漸恐凋毛髮歸路有歧途去去當
安出

三十三初度家門感賦

古人不肯出戀此晨與昏顧我孤露兒住住亦何云往者
飭輪鞅謁選來都門未遂魚逐隊已困羝觸藩三年兩歸

里況乃驚妖氛因循再寒暑那惜陰寸分既非念庭闈又
非堪隱淪呼馬與呼牛自審殊難真

憶我覽揆辰父母年向艾養兒望兒長教兒恐兒敗兒病
親見掣兒讀親聞快及至兒長成兒親已見背當其撫兒
時詎不念衰憊不以衰憊心易我勞與誨匆匆風木傷已
到十年外古人願爲兄永抱終天嘅

東風三月時吹折棠與棣兄爲達之伯弟居鵬之季甲戌
至戊戌長弟廿有四十載教養恩兼盡父師事慰讀兄餉
鮮憐寒嫂製毳秋草鶴鵠原忽忽五六歲撫躬叢百魯陟
岡空隕涕

儒生重一第結習匪自今豈必富貴來藉慰寒窗心搆文
或忘曉苦讀常夜深三獻三別足抱璞空沾巾已傷親不
見况復無知音可憐黃泉路望斷飛泥金

世人輕賞郎矯傲非太過釋之與相如古人不可作學未
三策通書無萬卷破徒以金粟豪坐使班聯惋柰何窮措
大乃拾前人唾羊胃竭脂膏駒促成坎坷侏儒不獲飽何
如臣朔餓聊以自解嘲曰此爲盤錯

謂是讀書人鑽研不如蠹謂非讀書人執射與執御垂髫
亦授經南北東西路六十餘萬言那得尋章句我性本無
恒嗜愛紛無數書奇篆隸分文鵞詩詞賦多好竟無成能

勿終身誤三十三年春已如電如露

寄九蘭書紙有餘幅綴以小詩

存一

如水柔腸剪不分閒愁萬疊似春雲願心化作輪蹄鐵盡
數馱來訴與君

喜張梅臣至流連三夕得詩四首卽題其實城草

天邊缺月圓海上故人至握手認鬚眉各道三年事戊春
行愆期天爲一夕地我登逐隊場君攬澄清轡金鼓從西
來鄉井成烽燧家山涸轍窮客况針氈寄挑燈抵足談滄
桑如隔世鐘動晨雞鳴耿耿遂忘睡

忘睡豈遂已倦意相侵尋戀彼鐙燭光失此分寸陰新詩

互探討濁醪相勸斟大海迴紫瀾殊愧如蹄涔前日雙鯉
魚迢遙春水深腹中一卷辭字字花間琴龍門昔善游雲
夢開胸襟君詩如有助山水多登臨

登臨何處所乃在江漢涯昔君顯祖考遺烈今在茲衛戍
請易名日月會有時匆匆十餘載何日能忘之衛難國不
辱無慙貞惠辭瀝我枕戈心上額君恩施今日陳封章
明日頒綸絲上表忠臣忠下憫慈孫慈樓頭有黃鶴舞
以爲君嬉亭中有仙棗實以充君飢抱此義烈胸餉以煙
霞姿所以發錦囊沁入人肝脾

肝脾雖可見蹤跡不可留主人欲投轄僕夫催鳴騶謂我

勿相念再訪期中秋况復槐花黃可同歷下舟憶我二三
友萍水東西流勝地一歡聚此樂知能不雲將過扶搖偶
與鴻濛遊相遭有適然勿爲先事籌發軔車轡麟心逐雙
文翰

白雪樓弔滄溟先生

北望鵲華青南望佛山碧何人鼎峙足千秋中有元龍樓
百尺當年歷下垂盛名與王元美稱巨擘宗臣梁有譽徐

中行

吳國綸

互宏獎力追復古崇風格四溟山人特雄傑

柰何中道成棄擲文人例持門戶見出入異同相指摘公
安竟陵變纖響瓦缶競進黃鐘斥絳雲選樓有偏嗜攻剖

幾少完膚擊至令櫟下厭喧囂王李鍾譚同割席嘗論有
明一代詩大筆允數高季迪青田金華振纖弱一朝風氣
初開闢宏治以來稱盛軌信陽北地聯翩翼左右驂靳更
有人徐昌穀與邊庭實前後七子各臻妙初盛中唐略相
敵蛾眉積雪閨苑霞先生有此高華色匹以弇州四部稿
譬如聯珠與合璧粗砂大石或亦有江河那容勺蠡測我
來弔古心傍徨登樓一醺寒泉漉首頰小長蘆釣師折衷
此論堪程式勝朝風氣數從頭興亡一代相消息禾黍西
風三百年詩人留此青山宅

滙波樓

重樓結構接滄溟壓倒湖心厯下亭西北水通千鄣綠東
南山抱半環青城隨鷺激鷗汀曲秋帶菰煙蔣雨聽文敏
畫圖文達勝鵲華終古共英靈

送張甥仲偉省親陝右

時同客
濟南

明湖幾日起秋風落木驚飄暮雨中枯葉辭枝猶戀戀游
人惜別況匆匆隴頭西望浮雲白溜水東流夕照紅此際
不須悲寂寞多情城北有徐公

小鶴置
酒爲餞

猶憶鄉關悵別時團圓八口共西馳十年骨肉凋零感兩
度歧途涕淚悲整酒黃花增錫鞬山川紅樹寫憂離此行
莫上慈恩塔故國滄桑不忍思

湖山堡

纔倦明湖汗漫遊
脂車東望近萊州
羣山到此峰巒盡
一水相環荻葦秋
遠浦無波涵野鷺
斜陽倒影散耕牛
故鄉亦有桑麻地
只是湖山遜一籌

郭君子嘉畸士也
年近五十而不留鬚
同人異焉子恐其奪於衆議持之不堅也戲爲長句以壯其志

常人拘於形達士從所好
男子有鬚眉在心不在貌
古有長鬣名亦有于思號
或作餘腥呼或蒙棄甲誚
礫然蝟毛集森列戟鋒
倒貌非不岸然未必心
相肖偉哉郭夫子妙想
破天奧奇方却老醜新
境拓年少旁人頗嘖嘖
窺揣莫

得竅謂是避懸車宦途所不蹈謂是媚側室冷比孤山峭
夫子不自言我代宣其要去髮而留鬚釋偈夙有詔不佛
有佛心道以反用妙我聞古文人蘇以髯稱譟迦陵與南
阜巖巖有同調夫子肖其心柳下斯善數不煩斷吟髭詩
境已深造亦可省掀髯竟作軒渠笑開此大法門請君爲
先導勿畏潞涿譏易我堅貞操

醉司命歌

西家沽春酒東家割黃羊聲聲爆竹催年光僉云今夕司
命上天去一年功罪陳封章我聞司祿司中與司命六星
倬漢名文昌胡爲竈君異厥號有妻有女誠荒唐

神婦王
氏名慶

忌有五女
皆名察治

將謂天下一司命安能恒河沙數一分毫芒

將謂一家一司命無乃天錄亦許充貴耶或曰竈者要是
五祀一攷之古籍殊煌煌大夫之祭禮有制豈因致媚羅
酒漿我敬司命進一觴萍跡偶爾留他鄉天當降祥與降
殃我家司命遠在千里外我之功過誰主張將毋亦如人
世治流寓隨所處所如編氓抑或神靈能遠察聰明所到
不限界與疆可能此也不登彼不錄無關賞罰如逃賊又
聞君子自立命神攬其柄情非臧未來之事何茫茫壯不
如人老可見升沈一聽神低昂鑑香裊裊靈旂揚遙知紳
笏臨天間年年此日司命同一醉無怪是非顛倒都尋常

除夕題陳九蘭全形彝器歲朝圖

往昔山川得鼎彝僅以硬黃揭其字金石之學盛
大清
既工摹文兼摹器股周弦徑畫法參雷同雲糾形模似遂
令煙粉潑翠容化爲水墨淋漓致蓮硯主人發新想自出
家藏新位置繁枝亂插關東風名窯片瓦不足異嫣紅姘
紫各爭媚骨重神寒誰與例譬如齊姜與宋子妝東豈作
時人意況屆新韶律琯更綵勝桃符輝迤邐椿榮萱茂北
堂春蘭馨華潔南陔志瓶罍薦進春酒花枝掩映萊衣
麗用斲眉壽保子孫吉祥文字看題識我有雙壺與雙敦
未暇瓊蠟模形制東園種樹已十年每到花時恒旅寄題

君今日歲朝圖觸我連年歲朝事願君常抱歲寒心與我
不磨金石契

石蓮閣詩卷二終

石蓮閣詩卷三

丁卯以後詩下

海豐吳重憲仲懌

外姑李淑人幡詞

天上榆躔掩人閒薤露秋鍾儀知共仰撓甲痛纔周稽郡
妻賢孟瀧岡母重歐芝輻何處指瑤島最西頭

東武論家世洋洋表大風百年八科第五世四南宮尹姑
衣冠舊班姬訓誠工貽徽終不沫聲望隴西崇

秦晉絲蘿締韋平閭閥開內嬪會降內萊婦合居萊佐讀
聽鈴索諳羹進鼎梅無慙家乘裏彤筆寫崔嵬

佐陶妻是翟訓柳母惟韓松菊三秋徑獲熊五夜九收華

天不慙喪淑國同歎慘淡東風裏鵲啼落月寒

姑有扶牀弱家無轅釜聲推心憐乏食燭手恤翻羹久著
溫恭德何慙慈惠名誅辭憑盡竹莫罄此生平

昔我彫萱蔭椿闈尙淞東書悲千里至鯢說四民窮鶴馭
驂今渺鴻眉案永空樛材慙潤玉灑涕對祁公

染徧麻衣血哀哀苦由邊寒水空鯉躍佳壤竟牛眠久抱
春暉痛同悲陟屺篇孤兒兩行淚一十六年前

階下孫枝秀依劉鎮不違如何鸞一駕不待鳳雙飛暮景
飴方弄冬郊薑正肥桐陰春露冷華表鶴空歸

欲召巫陽問招魂徧九垓華曇雲散曉慈竹蔭彫春挑菜

纔新節拈花定夙因道途猶實涕誼況屬周親
飄泊憐甥館淒涼念客游隔年剛百日一病卽千秋界已
天人判恩難推解酬慈雲今夕杳瞻望痛黔婁

王家口道中

光陰十載付征軺賸有輪蹄鐵未銷困久功名驢背冷旱
餘塵土馬頭驕相逢客比東西水定候風如早晚潮此去
莫嫌春色暮長途纔綠柳條條

曉聞秋風

一夜西風裏斷雲蕭蕭械械聽難分怪他鄰樹真多事作
出秋聲不忍聞

遣病

沈腰憔悴滯天涯
況復悲秋感易加
一味銷磨長夜燭
十分將息早春花
幼安木榻憑顛倒
摩詰繩牀了歲華
最是春明諸舊雨
多情常過旅人家

市月與夫幸息勞
閉門蟄伏似藏逃
往來久缺輪生角
吟詠長蕪硯不毛
爲遣心煩書帙在
聊安肺病隱囊高
却思一事須身健
莫對黃花悵蟹螯

黃升店曉渡

來問橫槎口東風
峭不勝馬蹄蹴殘
月鷁首碎春冰碾
雪雙輪健塵寒破
帽能頗聞修瓠子
疏鑿事重興

兩縣道中

枳籬四面繞茅菴修竹千竿水一潭都與故山風景異此
鄉知已近江南

傳噓河

一輪碾碎玉稜稜二月山河尙作冰沙白水清何所似碧
玻璃外月華澄

石橋早發

路指白雲隈羊腸往復回霧吞山影去笠送雨聲來夜宿
安茅薦晨炊煮芋魁三年慙築室鄉校請追陪

此次赴日照爲許先

生入祀
鄉賢事

趙家溝

犂确山程曲徑微春煙十里澹林霏平沙帶雨魚鱗細遠
岫黏雲佛頂肥碎石一川舒異錦梯田百磴挂僧衣如何
留滯桃林道聽到鵲聲尙未歸

謁印林師墓

山海蔚靈秀葱鬱鍾大儒吾師南閩裔制行會閔徒善事
蕭齋翁八十三歲殂哀哀孺子慕文孝諡非虛

鄉人私諡文孝先生

經學遵馬鄭研精不佚粗小學祖顏徐音訓窮根株道咸

際世隆往籍爲苗裔擎經首儀徵蕉聲繼平湖未谷著義

證勤恪

聊城河帥

倡權輿師任校刊役點畫無模糊

勤恪刻桂氏說文義

證師始文愼涇縣河帥考史籍欲并經籍驅編纂未卒業大願終其事

付子虛

文愼欲修史籍考以繼朱氏經籍考業鉅未成

僅遺攀古稿歿託承祚閭

遺稿命交外舅陳先生

舉以付賤子迄未完編蒲與我先子交不變

黎任初襄校在臨安雞鳴風雨俱丙辰痛陟岵敦請來海

隅

延師校定先君遺著

恆於校定暇眷此第二雛訓我麗則賦東馬

兼嚴徐戊午孟陬月痼疾遽不瘳與師返桑梓纏綿十載

逾右臂幸能運取稿復箋塗其時黃巾起南北亂已撫築

堡與避地奔走同呶呶師體久牀第動轉苦不舒載其先

世主與我遺澤書病肢居其左共挽一鹿車山砦卒不守

散佚在溝渠南羽

少

徐購求稿卒歸弊廬使我手澤完慰

我淚眼枯師友誼如雲迴與世俗殊父書與祖硯何日能
忘諸易簣六寒暑丙舍方始趨略抒釋菜心跪拜荐春蔬
執手相向哭少山同往此痛誰能如桑梓諸父老見我同歔歔
願將師學行額請達天衢宮牆近咫尺永享鄉賢蒞築場
空有志歸程已戒途難將松柏攀轉步猶趨趨

贈丁少山良善

苦憶盧鴻舊草堂十年夙願快今償獨肩浚長千秋業同
燕南豐一瓣香耽篆地鄰秦詔石傳經人近鄭公鄉烽煙
先箸憑收拾每撫遺編總淚浪

石叆沙堤路幾彎松篁陰裏扣雙環抱村綠樹遮三面窺

戶青山露半鬢住好田園知志樂多佳子弟羨身閑樾紅
一額勞揮灑憑歷輕裝伴我還

途中作長歌寄丁少山

約同遊琅邪臺未果

自我從西來於山遊五蓮於水乃見滄海萬里茫無邊必
有人兮隱處於其際以與山水元氣相周旋磴山之下竹
河側結茅卽是高人宅緇塵軒與冕土苴金與帛自謂羲
皇以上人高風彷彿陶彭澤聞此十年來懸我心目中景
山歎仰止向若嗟無窮今乃邂逅於滎阿之下鳴皋之東
吁嗟乎吾見世之詩書門第簪纓族墨墨者鄙知食肉一
醉易告身爛胃謀章服君非地勢使之然乃能矯世而厲

俗齊魯今大儒首稱許夫子君從折節遊授受得深旨纓
紱慮澹圖書富許鄭功深詞藻恥川與涂阻且長脂與秣
急且惶天乃不能置我於君旁東風吹起五兩屐忽忽又
整歸來裝山石礧礧兮桂樹連蜷恍惚有人兮援琴而彈
欲我並駕兮縹緲飛仙手折若木兮嘯傲臺巔乃以虺隤
兮我馬不前辜負相招兮霞舉翩翹願因晨風兮贈子詩
篇一眉新月兮遙出蒼煙

朱文信國公鐵如意歌

并序

器爲六舟所搨以贈先許印林師者今歸丁子少
山器長尺有半背鑄聖瑞文天祥制陽識六字按

夢占類考公名雲孫字天祥以字行及廷試第一
理宗見其名曰天之祥乃宋之瑞也字之曰宋瑞
云云茲曰聖瑞且篆法纖弱其眞蹟未可知昔黃
左田先生題信國琴圖詩攷其景炎元年不應有
夜宿青原之事而斷以忠臣手澤爲世愛傳不敢
遽以爲贗之語景慕之思溢於言表敬師其意賦
此長歌

嗚乎信國公從容殉大節於今五百八十年遺澤猶留一
鉤鐵鐵背銘詞鐫六字曰聖瑞文天祥制詩僧搨墨共流
傳我觀公物見公志公昔生也兆紫雲公及冠也擢狀元

公既相也宋已去公之死也未五旬烏金一握思風度山河半壁憑分付賜字新鐫柄上銘知是登科年後鑄我聞公性初豪華唾壺或以和筆琶又聞公也自貶抑軍中或佐指揮意自從眞州夜走空坑敗悲涼柴市銘衣帶擊節高吟正氣歌遺器遺文同百代吁嗟乎物之顯晦信有時

公之遺愛今在茲雲孫小印玉帶硯枯桐尾勒青原詩

趙升

之姬隅集有信國碧玉小印詩朱竹垞曝書亭集有玉帶生硯歌黃左田臺齋集有琴圖詩

乃知物以

人重同不朽足與齊簡孤筆良椎武節千秋垂髭髮參軍

公知已琅玕一握恰好相追隨

謝皋羽竹如意近人高麗中有長歌惜哉象

奕圖譜四十局竟隨玉屑埋蒿萊

公嗜象奕命名自玉屑金鼎至單騎見敵爲四

十局勢玉曆
所居山名也
嘗將臣節論忠義明季差堪儕宋季鐵工輸

與張鰲春姓名猶得傳附驥鳴乎兩公如意從此留人間

藝林歌詠成嘉事有宋一代文信國有明一代趙忠毅

如意爲張

鰲春銘

畫蜀葵自題

客裏鶯聲老一春家山辜負好芳辰階前隙地無人種自

長葵花高過人

勞東五詠壬申十月與李竹朋年丈同游作

白雲洞

千松萬松何離奇千石萬石何纍垂松尋石罅逞天矯石

石遊記卷二
凌松上爭厓屬主峰一石最奇崛俯首乃受松之欺直據
其巔盪其腦蒼髯恣肆鱗之而左軒一石勢崩列蛟背如
立湘妃危右伏一石於菟卧不甘帖耳形彫彫兩株鵬腳
那冒讓騰空四散青珊枝道人何年覬天輿梯以石橫支
以移陰崖不借鬼斧劈翼突懸是土工施門前雙峯屹相
向嶄如頭角眞疑疑滄溟萬里瀉傾洞直來腳底如奔馳
我當重九命山屬杖藜猶待人扶持骨酸趾繭乃得到冥
搜不覺忘辛疲西峯虧蔽日易落結璘早射長空輝銀鱗
倒捲雲萬疊謾謾時有西風吹爲我送雲東海去好教雞
唱看朝曦

華巖菴

天風海水聲刁騷忽聞細籟吟笙匏路轉山腰入山腹萬
竿鳳尾縈脩脩鑿幽縫險拓此徑幽菴乃結巖巔茅寺門
那許世人識籊籊龍鞭起圓週遭青霞斜截斷厓脚綠雲密
補虛巖坳槐龍對盤勢擎攫級盡乃叩禪關遙地僻儘多
花木趣秋深紅紫紛僧寮籃輿纔歇涼雨至四山如沸滄
溟潮我聞二勞勝非一此山此竹應翹翹春雷怒迸蟄地
筍秋風齊掃千雲梢昔訪桃源武陵境幽谷趣與貧簞饒
二十年來繫心目舊懷新賞同相撩鬢絲禪榻感變易夜
窗怕聽聲蕭蕭已知食肉素無相禪有玉版吾將逃

上清宮

青山口接黃山口斷崖一縷蜿蜒走行人導我上清宮肩
輿倒挂山蹊陡門外霜林燦若霞丹黃錦抱屏風九入門
堂宇已荆棘銅鋪剝落丹青朽道人指我尻下碑道茲山
數茲宮久自宋昌陵御宇初華蓋真人相與友賜額流傳
直至今源流遺事從黃耆堦前銀杏大十圍浮來老樹難
爲偶傳云一千五百年密蔭縱橫將過畝金時仙子邱長
春十詩大刻摩崖首又有蓮盆至正銘璫蠟無難辨誰某
地運從來有興替山靈或亦分衰阜芝房久已委榛芳青
精日漸艱升斗零落槩題古木荒淒涼殿宇名山醜自從

客年議興造鳩工始漸選身手恢復時虞舊址難經營頗
慮規模苟我聞此語爲歎息滄桑境且仙家有何時東海
更揚塵挾輿但聽天風吼

太清宮

叢篁古木連蜷起中藏大谷幽無底不留一綫透天光雲
影濤聲難計里愁山當年占此場負山襟海靈區啟奇青
環抱四圍峯驚颺怒捲南溟水究以不終事殫竄神仙洞
闢浮圖圯

此道場爲愁山開闢
因事貶逐乃改道院

鸞鶴笙簫接渺茫相傳數

百年於此仙境非仙總浪遊古今乃一青蓮耳我昔小年
侍遊宦海內名山多屐齒豫章桂林楚汴燕蜀黔秦晉兼

桑梓分無仙骨與仙緣縱遇仙山將何以移我成連海上
情凝頑莫悟琴中理日向潮音洞口看風回萬里波瀾紫
釣龍磯

大石逆波波驟驚驚波撲石石能鳴銳石劍鋒平石砥礪
石壁立圓石壘陟陟石作斜下坂脊露石如高建瓴波來
那論容與否一氣激宕無休停前波方逆後波退後波又
擁前波行高波直越矮波過立波乃壓橫波生奪鋒疾如
箭脫筈散溜紛若檐懸繩衝突迅具奔馬勢洄渦圓轉旋
螺形銀濤密濺飛雨射赭岸怒走晴雷轟初疑九天落欬
唾齊迸十萬珠璣瑩又疑千年不化雪颶風迴舞來滄溟

陽萬里波濤晴去時曾立磯頭望島嶼遙接帆檣輕同時
纔入潮河底喧豗卽異前番聽此夕正當月之望圓靈如
鏡東南明再向磯頭立縹緲耳目眩亂身疑傾我想子丑
開闢會山腳尙有山尖橫自從洪水盡歸海瀕洞乃與峰
巒平名山豈甘沒波底頭角各欲分崢嶸天吳海若不相
下故以搏擊成紛爭金波激灩那得渡幾回惆悵移蜚更
仙人空說釣龍去水底時有龍吟聲

題李芳圃同年

樹田

禪心俠骨圖

嘗觀恆河沙數皆庸庸惟我釋迦佛氏稱大雄禪耶俠耶

渾化兩無迹其途雖異其趣無不同一自浮屠之學濫六
代琳宮紺宇盡以緇流充又自遊俠之風靡西漢屠沽販
豎亦冒黃衫容似禪非禪似俠亦非俠葉公所好無乃非
眞龍吾友李侯夙抱奇異質六經三史卅載書帷攻拔萃
一科僅偕孝廉舉春官四上與我同飄蓬潘岳河陽乃作
花縣計桂林象郡是我前游蹤玉堂觚稜已作泥絮看去
稂拔薤要偕干將銅偶寫斯圖聊以寄此意袈裟趺坐斜
倚赫連鋒昌黎闢佛不妨大顛友眉州忠節時與佛印從
朱家郭解所爲尙跡象太原公子獨重虬髯公須知君禪
在心俠在骨蒲團劍匣粉碎皆虛空宰官之身偶現比丘

相貪嗔斬斷三尺青芙蓉慈航萬里扶搖到嶺海好化廿
年戈鹵歸春農雖然色空佛說最云幻得失都如塞上黃
髮翁安知失馬非失得非得偏於意外顛倒人窮通我姑
妄言君亦姑妄聽瀛洲草綠轉瞬吹春風天豈真以土元
困百里行見大羅天上相雍雍

爲九蘭題東魏興和二年馬都愛造像

九蘭示我興和像約我同作佛像詩三十二行脫蠶蠟馬
都愛造傳於茲二年庚申歲十月乙巳建朔辛亥期仰爲
父母生樂國兄弟姊妹兼相隨同姓六人異姓四清信不
列優婆夷辛之爲新出訓詁字雖假借非支離駢詞十行

徇時尙波磔豐潤含權奇拓工訪石走青郡椎募片紙來
臨淄晴窗古色映翠墨偏旁別體推然疑君家北朝石最
富代備梁魏齊周隋三十餘種昨拓贈裝池掛壁心摹追
靜悲目連時最近君藏有興和四年靜悲造像興和五年劉目連造像得此鼎足聯
璜琦物聚所好自古昔歐陽集古陳其詞搜羅抉剔須盡
力珊瑚鐵網方無遺蘊包席捲可立致用韓句勿使貞珉終
古埋蒿藜

題板橋道人畫石爲灘于寶泉銘書

二分明月揚州多紅橋流水今如何賢宰官往已百載遺
愛豔說程符阿偶以餘技作繪事澧蘭嶰竹皆遮羅誰與

配者一拳石冰心狷介形礪柯憶昔捧檄到斯邑書生圭
角無礪磨文筆仍作女媧鍊說法如聽生公訶行蹤五嶽
在胸次鬱林一片歸裝馱偶濡墨瀋作小幅不圖皴透圖
盤陀畫裏南宮拜顛米和中東海來髯坡寸長尺短喻夷
惠後先見者嗟同科原題云米顛下拜略嫌其小藏之袖中略嫌其大所謂不夷不惠可否之間者乎真泉欲取以自喻故云我聞公才妙不世氣凌嵩華吞岷峨尺幅
乃具千尋勢掃盡花葉兼枝柯至今生氣蟠水墨拂拂十
指騰紋螺客窗展讀三太息願隨竹馬來謳歌

題晉太康銅匱

從來奢麗說阿房良冶重看出洛陽不讓渭南漁父物香

匱一具記筠廊

朱牧仲先生筠廊二筆載渭南漁父於渭水中得秦阿房宮香匱一具色如鸚哥羽

毛

遺制無多但贗摩挲重認太康年汲碑明竟楊家茆至

寶休誇鼎足傳

太康元年明亮竟藏錢唐黃氏太康五年楊紹買塚地前在浙江山陰太康十年太

公呂堅表在河南汲縣此外太康年者但存專文而已

秦漢而還石勝金椎符槃鏡曉星沈

永平二年小將申雨椎始平男丞邑男騶

男三虎符秦始九年銅澡槃欵秦始十年鏡晉金流傳者如此而已當年幸脫含章火是年十一月含章殿鞠塋火典午遺文尙見今

題東魏興和五年劉目連造觀世音像

我藏興和造像九二三四四年居其八

二年趙勝習件二人造像馬都愛造像胡

元方造像三年道山造像四年阿鳳阿難
造像大吳村合一百人造像靜悲造象
元象一年元已

改沿作二年元乃缺

元象二年姚敬遵造
像卽興和元年也

歲易癸亥號武

定沿譌猶作五年說

興和止四年五
年卽武定元年

一千三百卅一年風

霜有劫文無滅昨手丹砂拓此銘如印印泥沙畫鐵客秋

一題馬都愛長歌曾博陳郎啞

爲陳九
蘭作

爾來心境枯于禪

若禽息羽蟲蟄穴明窗小幅日展對蓮華一瓣心香蕪我

聞觀音多變相此圖惜未摹雕鏤家藏延和像一區孟蘭

會上會施設

造于延和元年
七月十五日

與此形神可頡頏同頭想像

難分別好作達摩現化看十年面壁塵緣絕不見當時妙

色身且饒今日廣長舌

西漢綬和雁足鐙歌

文曰綬和元年供工二譚爲內者造銅雁足鐙護
相守嗇夫博掾並主右丞楊令賀省重六斤成帝
卽位之二十五年癸丑改元所造同治辛未出關
中今歸外舅壽卿先生

長定宮中黃葉秋大司馬用新都侯

是歲十一月丙寅
王莽爲大司馬淳

于賂敗曲陽去咸陽王業彫潛謀是年孝成祚欲盡建元
七改儀容修君王心不化明燭但照宮館羅紈愁鴻嘉以
來隆內寵陽阿禍水傾炎劉是鐙綬和改元鑄相掾丞令
名雕鏤不及班姬照輦道銅沓祇映金塗浮幄來裝點石

華褒紅搖春影椒牆留赤鳳歌殘燦歸路綠熊席暖輝香

簞漢宮奢麗那得見眼界輪與殘檠優史傳孝宣精器械

元成以降難追求建昭

宣帝時造

竟寧

元帝時造

兩雁足乾嘉老輩

爭吟謳此鐙後出幸快觀生晚不抱昌黎憂信都食官建

始造

信都食官行
鐙建始二年

臨虞萬歲元延鏤

臨虞宮鐙萬歲宮
鐙俱元延四年

余

家高鐙亦永始

家藏永始三年鐙
四器皆成帝時物

三朝較量俱無備未隨

陽朔例頒賜

建昭雁足鐙又刻今平陽家畫一至三陽
朔元年賜十三字蓋成帝以賜王鳳者也

棄

擲得免漸臺甌賞將古今論興廢始疑須作冰霜籌桓靈

先短漢獻祚熙寧早翦徽欽庥西京元氣蹶此命哀平薄

祐將何尤蠅聲紫色託官禮九錫遂欲唐虞伴一朝事關

九廟重美新致累揚雲蓋閱歷殘燈泣風雨坐對缸粟如
懸疣

莒小子雙殷詩三十六韻

文曰莒小子徙家弗受用敢作文考寶尊殷其萬
年子子孫孫永寶用大人舊藏其一李竹朋年丈
得其一許歸一處乃以他器易得

國僑昔使晉賜莒二方鼎重器古所貴況兼駢以整我觀
傳紀間所載亦井井紀廡齊賄珍襄鐘鄭賂詗壽夢與甲
父郤舒文互省寶鼎雖不一奇偶勢殊等偉哉莒國器至
今餘烟炯二鼎雖已淪雙殷乃猶併文曰莒小子萬年寶

用承徙家弗受文佐祝文考鯁同質非殊范一文乃異皿
紋迴雲點黑斑留苔翠冷枵腹略類瓠象圓欲說餅鸞環
形抱珥朴素義尙褻黜若髹點漆澤比金出礦先子寶其
一珍重如摺珽常念延津劍何日得合並李文念兩美不
合心終耿連城乃歸趙商於不欺郢瑞若聯珠璧斷豈續
頸脛遂使千載下藝苑快雄騁嘗攷莒世次略可得其梗
茲平及郊公七主生非挺獲挈季友歸出僕行父請務婁
及滅明奔執不自拯密郛城恃陋防茲地非迴蝸角國難
爲強鄰况壓境豈類漢孝宣技巧夙精警乃與所制器今
古同彪炳什襲重綈錦裝潢斲檀癭非獨虞壺匱

先藏有
虞司寇

雙直與齊疊

齊侯雙疊今同歸吳平齋先生

子產號博物晉賜始管領

我不黃熊辨兩器乃獨秉眾金同紛羅譬若囊出穎離合

千百年蒼萃乃俄頃摩挲發古思作歌志深幸

熒陽宮登歌

文曰熒陽宮銅小鐸登重十兩半

熒陽宮名不見黃圖擬以蓮勺博山鑑

蓮勺宮博山鑑見薛氏款識蓮勺屬

左馮

煢或通榮如是夫

榮陽屬河南郡

憶昔數騎重圍冒可憐黃

屋與左肅付之烈燄項何暴

漢三年項羽圍漢榮陽紀信乃乘王車黃屋左肅降楚羽

燒殺

嗣發材官與車騎

孝惠七年發車騎材官詣榮陽

文帝三年濟北王興居反欲襲榮陽詔柴武爲大將軍擊之祁侯繪賀爲將軍軍榮陽

元鼎乃爲行

幸地

元鼎四年立后土于汾陰脍上禮畢行幸榮陽

想見別館兼離宮金釭百道

輝晴虹鳬喙雁足將毋同苦宮曲成都號錠

苦宮銅鳬喙
燭錠舊藏畢

氏曲成家銅

足之有無義以證

廣韻豆有足曰錠無足曰錠

館陶最新

乃曰釘

館陶家銅釘藏嘉興張氏說文釘鍊鉸黃金而無錠義疑以音同通錠

此曰鐔登文

更新諧聲會意空斷斷字書可補尤堪珍

鐔字字臨虞氏書不見

奉山

張氏

文小變鐔未改從金面以登爲錠本字見漢鐔

重都斤以上茲十兩半獲尤叔小摘一瓣蓮花樣槐里壺

右扶風

慮虓尺

太原

藍田谷口

並京兆

鼎文赤器以地名皆可譯

不紀建元與高徑造省亦缺工名姓隸書十一明珠瑩當

時執向何人手千餘年下歸吾有拓銘請附池陽後

劉燕庭方

伯有池陽

宮鐔歌

棣州觀松雪書三學寺藏經碑

惟聖乃闢佛非論賢以下觀弈道人昔有言書派亦有同
然者篆籀分隸本一源六朝以降殊塗寫宗派遂分碑與
帖譬如北轍南轅馬邇來時尚崇北碑殘銘斷象珍拱把
動以俗書斥義獻爭傳新獲稱淹正唐下且等檜無譏奚
論鷗波姿姪姪何異儒冠甫著身闢佛驟入昌黎社我不
知書好收蓄古今欲入一鑪冶燕瘦環肥各擅長濁賢清
聖均杯斝兩賢頗謂不相厄門戶何必紛搏拊棣州建置
代最晚天禧於此開蘭若朝厯金元迭廢興田公乃用祈
純嘏六千餘卷致經律遂發宏願大施捨礪石虔請福公

文

沙門福興撰文

大都承旨書丹赭墨鳳猶存碣已斷尋行欲讀

文庠房吾郡古刻稀晨星得此已堪矜滿假波磔尙可追
鍾王鼎鍾何害儕虞夏松雪游蹤昔駐驂濟南山色供揮
灑誰華難覺舊時圖穹碑猶矗青齊野堦墟無妨古集歐
庠挈且學許敲賈莫問蓮花舊日莊斜陽梵宇飄殘瓦

癸酉閏六月初三日大熱偶作

火織張空赤日行蟄居揮汗一編橫偶然回首成驚覺忘
是瓶荷卸瓣聲

病瘡

病至渾如早晚潮潮分子午病鄰朝寒疑一綫冰山倒熱

比千軍沸浪騎截少控弦吳越弩信如抱柱尾生橋伯顏
三日灘沙上可許胥濤再一消

吾鄉於孟冬朔掃墓焚楮絮謂之寒衣亦人子不得
已之心也今年冬以病未能至墓田痛心所觸書爲
此篇

三冬之寒豈楮所能暖重泉之骨豈絮所能溫莫暖莫溫
焚之爾何事兒溫兒暖能不思兒親衣裳衣襦親卽念兒
冷冬溫夏清幾得兒晨昏親舍兒去二十歷寒暑親裘親
帛悉以溫兒身兒身旣溫兒親在何許楮絮雖幻勿亦人
心仁朱子百年終身卻綿帛至人天性薄夫聞能敦吾鄉

雖陋此俗未云妄殊類告朔禮廢羊猶存孤兒今年三度

遠邱壑家居如此游宦將焉論

清明在郡自中元前病痂至孟冬朔猶未愈秋

原霜露枯荻賸百草松楸寂厯落月悲風吞不知重局一
寒竟何若痛心所觸裘帛難爲春婦封兒識以付孫子手
若袍若褶閒以新緼廣寄到九泉果否可裁製忍謂已寒
之魄徒虛文生前一裘一葛未嘗奉悔矣何補縱使年年
焚薰沐題畢回腸百折斷秋陰慘澹悵望南天雲

題得鹿園爲榮顯亭太守

光

祁連山高如玉矗野潦秋涸荒蘆禿掌大雪花連日飛填
坑塞棧平陵谷麕驚狐狡互分竄縱橫蹄跡踏瓊玉鞞鷹

欲脫櫪馬嘶萬里窮邊快追逐此際鼓凍猶堪搥背負韉
矢腰鞬一圍旣合坐數獲分廐挂雉歸鞍足我朝家
法重騎射渥注名馬天閑育南苑春蒐木蘭獮安不忘危
詒謀穀臣子奉持凜此意雪獵寫圖心目觸我聞榮澤晉
楚交魏錡會射麋興六又聞禦寇說鄭人擊鹿曾用隍蕉
覆鹿與祿通見假借甲天下瓦文堪讀知君此圖兆嘉識
得鹿何殊云得祿他年幡畫列三公善禱無忘今日祝

鄭菴夫子初度招集龍樹院敬步原韻

西來寶鼎溯南宮早卜良金壽與同仙算一籌添海鶴師
門幾輩集秋鴻登樓嵐撲遙山翠隔樹垣繚古剎紅齊鐸

邵鐘諧搏拊各申蕪祝當歌風

題趙忠節公

景賢

丸書遺墨

代高陽相國師

金陵賊勢蔓延走浙西半是跳梁醜湖州一角危若懸撐
持乃能五月久孤臣力竭孤城頽東南將星墜加斗勁節
孤忠 天語褒哀榮忽已十年後遺孤及歲叩 北闕奉
公遺墨如親受六詩六札挾風霜日星同耀河山壽昔公
奉 命督鄉團溯自庚申閱辛酉全湖險失成孤注饒道
僅餘大錢口連日雪花如掌飛軻戟大牘徒膠守眼枯不
見援軍來帛書空繫行人肘悲涼血灑申胥淚淋漓指斷
南雲手守陴一哭事難知十萬生靈遘陽九臨淮韞刀不

及揮遂入樊籠牢械杻左車井陘雖生致文山柴市終無
負一朝畢節事千秋浩氣英靈同不朽兒聞父訃殉衡湘
十二齡童鳩入酒秋風蘋藻薦靈祠臣忠子孝鍾非偶
國朝廷賞世無愆階前蘭玉霑恩厚願繼先聲飭學修綈
襲傳家儷圭卣

極樂寺看花

九日困矮屋不覺春風生驅車西郭門香海紛相迎距寺
尙數武已聽蜂喧聲入寺無所覩紅紫霏繁英穠者天台
仙桃靨明霞蒸縞者姑射仙梨蕊銀雲橫丁香互交花紫
白枝相縈宜主與合德闕此身輕盈就中推海棠絕豔嬌

銀屏沈香亭子北欲喚楊妃醒頗謂美人美可比名花名
娛目卽爲色平視誰能憎我思草木繁美醜非一形蔡旌
溷菌桂蘭蕙埋榛荆搜採所不及亦自隨枯榮豈因逕世
闕改此芳與馨茲花幸得地豔傍僧寮明多少抱孤芳自
賞藏巖扃安得宇宙閒茅拔茹彙升桃李盡公門蘭芷皆
明廷藥簪四相冠杏宴千佛經小草亦出山志在萬里程
此願漫虛擬佛力應能勝舉酒醉羣花搔首天冥冥

自便門泛舟赴通州

大通橋下試鳴榔兩岸菰蘆入水鄉柔艣不搖秋夢醒沿
波小艇穩於牀

白蘋香裏釣絲拋如雨蟲聲葉上敲指點垂虹何處是石
蘭浮在葦花梢

夏家林雨

連日秋陰悶羣峰一雨中泉聲穿地壯雷勢得山洪樹抱
危巖碧垣繚寶剎紅漁陽原阨塞坦蕩慶車同

喜晴和潘瑞齋韻

灘聲一夜徹遙垌十萬螺鬢出沐青晴日透雲紅破碎山
田劃界綠畸零蛙逢新雨喧如沸鷗入涼波夢欲醒瀟灑
都如秋已至兩三漁火誤流螢

西風

西風淒客心吹墮一雙淚四顧向誰彈咽之肝膈內

五月 西陵道中和鄭菴夫子韻

犖角山程冒暑行黃雲潑眼麥畦明湖湘恍憶兒時路
板村村打稻聲

火繖張空路正賒晚蒸夕照曉蒸霞偶然樹底雙輪住
手掬清泉當品茶

西陵道中和鄭菴師韻

犖确山程展步難車如丸轉未容安鳳城路遠燕雲隔駿
骨臺高易水寒幾樹新黃霜後豔萬峰濃翠雨中看輪蹄
得共雙旌駐幸與皋比侍一般

黃金臺

燕昭昔闢招賢館百尺臺臨易水深六計興廉周世法如
何延士用黃金

馬蘭峪眞武廟題壁用李宮山比部韻

萬重煙樹薊門東匹馬衝寒破曉風巖腳雨皴苔澁翠枝
頭霜罽粟新紅宦情淡似歸飛鶴旅思淒於獨往鴻一事
對君差可做三盤雲壑在胸中

水抱山環路向東天因釀雪不成風漁陽阨塞重陰黑子
久峰巒淺絳紅往事漢唐看逐鹿昔時煙雨記歸鴻未能
再鼓湯泉屐十載塵氛一滌中

西陵道中和鄭菴夫子見贈元韻

夜雪門曾說立程 橋山又許侍行營
淞團遠樹多雕鏤 河帶殘冰半滅明
綿亘羣山圍夏甸 霑濡尺澤慰春耕
瓊樓玉宇貪看久 未覺寒威易水生

西陵途中遇雪呈鄭菴夫子

西向羣峰拱玉環 蘆溝高跨控嚴關
天邊遠樹森如戟 橋下寒濤凍若山
此際羊腸重覺徑 前時鴻爪又飛還
小年鳳嶺曾衝雪 廿載流光付水潺

雲中巖岫矗層層 斲粉雕瓊喻未能
拳慢客彈狐毳雪停 車僕整馬蹄冰黃
連月額銀成海白 疊風鱗玉有稜茅店

依稀何處指一星紅認隔離燈

南淀觀荷追和高陽師韻

鄴杜居然鈞鉅潭從游佩紱屏銀藍一池荷芰鋪雲膩兩
岸菰蘆戰雨酣脫稿何人擬茗霽裁詩幾輩繼樊南深慙
紹續無佳句領下驪珠已早探

青草池塘綠蔭潭羅衣葉葉染秋藍湖沈魚氣迎涼白晷
入蟬聲到晚酣孤塔遠標香界北雙流分滙液池南行蹤
付與輪蹄鐵幽境清游未與探

千章夏木蔭風潭蓼穗垂紅柳纖藍短約全教新漲拍遠
山渡趁晚霞酣如舟屋在花香裏戴笠人行柳市南北淀

煙波聞更好何時鼓興與窮探

桃花曾記褫春潭紅藥開殘尾已藍三尺涼波鷗背穩十
年塵夢馬頭酣白蘋渺渺懷江渚碧柳依依感漢南一處
勝游差足抵田盤雲物獨登探

大湏槃經偈在千佛山孝昌元年法義卅五人造像
記下書法與之正同石爲人斲去壬申歲竹朋年丈
贈此拓戊寅四月裝池成軸因綴斷句

一紙摩挲認舊銘恍於蠶蠟見山青本來面目休忘卻渾
沌猶留未鑿形

何物經年不劫灰蓬萊清淺且飛埃鬱林舟上歸裝富歷

下應增待訪碑

送星謀歸里

立馬斜陽裏，匆匆問所之。
秋聲都下早，歸夢故鄉遲。
蘭茂南陔葉，醪香北海卮。
如何苦留滯，似我尙天涯。

念我枌榆地，相於二十春。
自經兵燹劫，倍憶典型人。
檢樸衣冠古，端嚴氣味真。
吾曹慚後進，澆薄莫相親。

幾度燕臺聚，行蹤此度疏。
鴻泥多遠役，人海有藏廬。
寂寞花田晚，荒涼酒社虛。
離懷無可託，疆說付雙魚。

車中

烈日紅塵叱，馭行慵開倦。
眼夢將成耳，邊忽聽流泉語。
飲

馬槽頭竹筴聲

敬題醇邸所藏趙松雪九馬圖

唐代曹將軍九馬圖曾繪畫從錄事觀詩稱工部最入室
弟子韓幹稱筆妙乃能追不興松雪臨之又異代千年一
綫如傳鐙古來題詠似林立牛腰之卷繙何能漫歌畫馬
詩請言牧馬政渥洼大宛種莫矜唐成海西美誰競古今
蕃息數開元四十萬匹爲最盛當時監牧頗得法尻滿脰
圓盡龍性熙寧以後新政頒養馬費不由天閑戶馬保馬
異名目徒資紛擾嗟何關須知牧馬去害馬此事通於牧
民者芻秣以法飲以時畫工著意爲圖寫所願愛馬如愛

石蓮閣詩卷三

三

民整飭驛傳同拊循勿使虺頽與碑兀好爲皇路當風
塵何用駟駟騷騷誇神奇獨乘千里將何之但使拊與馭
得道自無伏櫪當風嘶

敬題醇邸所藏趙仲穆射虎圖

漢家猿臂李將軍世以授射垂聲聞草間疑是於菟卧天
驚石破風霆奔隴西家世重千古虎縱騰傷終殺虎數奇
絕技竟誰傳後人難繼前人武吳興公子玉堂仙能以六
法承家傳不寫鷗波清遠地乃以黃沙白草圖祁連一騎
前奔汗流沫一騎迴身箭在筈兩騎追蹤勢莫遏一手控
弦一箭脫最後一騎轉山隄牢握鞭絲作指撥虎氣咆哮

馬沸騰五人紙上鬚眉活我聞枚馬擅詞場工賦羽獵廣
長楊須知聖人賤異物夏書有戒嗟禽荒曷不圖畫幽風
繪無逸鄭俠或點流民筆丹青千古重璆琳禹拜臯颺陳
勿密又聞我朝騎射家法垂居安不敢忘艱危況乃
弧矢利天下六合萬世揚神威臣子咸當體斯義負韜
腰韃膺重寄燕息休教髀肉生武備乃以襄文事從知畫
工手可代天工釋靈如聽鸞雕弓勒石心胸請纓志披圖
萬里來長風

予於臘初到汴十日而病雖賃房數椽行同旅舍卧
牀九日始進一饌枕上聞爆竹聲知祀竈也

蕭蕭風雪打窗聲扶病剛能繞屋行何興來邀司命醉今
宵無酒亦無餚

石蓮閣詩卷三終